

REGLUGERÐ

112

29. sept.

um iðnskóla.

I. KAFLI

Markmið skólanna, skipulag og inntökuskilyrði.

1. gr.

Markmið skólanna er að veita þeim nemendum fræðslu, sem iðnmeistarar eða iðnfyrirtæki hafa tekið til náms samkvæmt lögum nr. 45/1955, um iðnfræðslu, og þeim, sem nema vilja iðn til sveinsprófs í vinnustöðvum, er skólarnir hafa ráð á. Enn fremur geta þeir haldið námsskeið til framhaldsnáms og til undirbúnings iðnnámi og ýmiss konar iðnaðarstarfsemi.

2. gr.

Í skólunum eru jafnmargir ársbekkir og námsár eru fyrir iðnina, þ. e. 3 ársbekkir fyrir iðngreinar með 3 námsár, 4 ársbekkir fyrir iðnir með 4 námsár og 5 ársbekkir fyrir iðnir með 5 námsár.

3. gr.

Þar, sem því verður við komið, skal kennslan fara fram í tveggja til þriggja mánaða námsskeiðum að deginum. Í smærri iðnskólum og iðnskóladeildum gagnfræðaskóla mega þessi námsskeið vera lengri, ef tveim ársbekkjum er kennt saman. Þar, sem erfitt er að fá húsnæði eða kennslukrafta að degi til, má kennslan fara fram á kvöldin, þó ekki eftir kl. 22. Þar sem öll kennslan þarf að fara fram á kvöldin, skal skólinn starfa svo margar vikur að fullur kennslustundafjöldi náist í hverri námsgrein, sem kennd er.

4. gr.

Almenn inntökuskilyrði eru:

1. Að umsækjandi sé eigi yngri en fullra 15 ára;
2. að hann hafi lokið miðskólaprófi;
3. að hann hafi náð tilskildum árangri við hæfnispróf, þegar því verður komið á fyrir umsækjendur um iðnnám.

Iðnskólum er þó heimilt að taka nemendur, sem ekki hafa lokið miðskólaprófi, ef þeir hafa lokið skyldunámi og sýna við inntökupróf, að þeir hafi nægilega undirstöðuþekkingu í íslenzku og reikningi til þess að fylgjast með kennslu í 1. bekk skólars.

II. KAFLI

Um kennslu og námsefni.

5. gr.

Í skólunum skal kenna: Íslenzku, eitt erlent tungumál, reikning, eðlisfræði, efnafræði, bókhald, teikningu (flatarteikningu, rúmteikningu, frihendisteikningu, iðn-teikningu), skrift (almenna skrift og teikniskrift), efnisfræði, rafmagnsfræði og aðrar sérgreinar eftir því, sem við á.

6. gr.

Lágmarkskröfur til burtfararprófs úr iðnskólum, hvar sem er á landinu, skulu vera sem hér segir:

1. Íslenzka. Nemandi skal geta ritað íslenzku sæmilega, að því er varðar framsetningu, stafsetningu og greinarmerkjasetningu. Hann skal hafa lesið beyg-

112
29. sept.

ingafraeði og setninga- og greinarmerkjafræði og kunna nokkur skil á íslenskum bókmenntum.

- II. **Reikningur.** Nemandi skal kunna: Samlagningu, frádrátt, margföldun og deilingu með heilum tölum, almennum brotum, tugabrotum og nefndum tölum. Enn fremur einföld og samsett hlutföll (þriliðu), prósentu- og rentureikning og allar helztu mælieiningar lengdar, flatar, rúmmáls, þyngdar og tíma, sem eru löggiltar hér á landi. Auk þess skulu nemendur í húsgagnabólstrun, járníðnaði, myndagerð, klæða- og feldskurði, leirkerasmíði, málun, múr- og stein-smíði, netagerð, prentiðn, rafmagnsiðn, reiðtygja- og aktygjasmíði, reiða- og seglasaum, sútun, trésmíði, úrsmíði, vagnasmíði og skriftvélavirkjun kunna að leysa uppsettar jöfnur með einum og tveimur óþekktum stærðum, og kunna frumatriði flatar- og rúmmálsreiknings.
- III. **Efna- og eðlisfræði.** Nemandi skal kunna undirstöðuatriðin í eðlis- og efnafræði og enn fremur kunna skil á þeim efnum og áhöldum, sem óhjákvæmlega eru til iðnaðarstarfsins.
- IV. **Bókhald.** Nemandi skal kunna að gera kostnaðaráætlanir um efni og vinnu, halda frumbók, vinnubók, efnisbók, dagbók með tvöföldu dálkakerfi og höfuðbók, enn fremur jafnaðar- og efnahagsreikning.
- V. **Erlent tungumál.** Nemandi skal hafa lesið vandlega sem svarar 100 bls. í 8 blaða broti. Ræður skólanefnd á hverjum stað, hvaða erlent tungumál skuli kennt.
- VI. **Teikning:**
1. **Almenn frihendisteikning.** Hver nemandi skal hafa teiknað a. m. k. 15 flatarmyndir og 16 klossamyndir. Auk þess skal hann sýna með prófi, að hann geti teiknað einfalda hluti nokkurn veginn rétt. Allir nemendur skulu taka þátt í frihendisteikningu.
 2. **Flatarteikning.** Nemendur skulu kunna að mynda horn, hringa, sporbauga, þríhyrninga og aðra marghyrninga, skipta línunum, bogum og hornum og innrita og umrita hringa. Nemendur í eftirtöldum greinum þurfa ekki að kunna flatarteikningu: Brauðgerð, framreiðslu, hárskurði, hárgreiðslu, kjötvinnslu, kvenhattasaumi, matreiðslu, mjólkurvinnslu og sútun.
 3. **Rúmteikning.** Nemendur skulu kunna að gera fallmyndir á tvo fleti af punktum, línunum, strendingum, strýtum, keilum, keflum og kúlum og sýna skurðarfleti í þeim. Einnig skulu þeir kunna að nota hjálparflöt og finna sanna stærð flatar og rissa frihendis fallmyndir af hlutum. Nemendur í eftirtöldum greinum þurfa ekki að kunna rúmteikningu: Brauðgerð, kökugerð, bókbandi, framreiðslu, hárskurði, hárgreiðslu, hattasaumi, kjötiðnaði, klæðskurði, kjólasaumi, kvennaklæðskurði, feldskurði, leturgreftri, matreiðslu, mjólkuriðnaði, prentun, rakstri, skósmíði, sútun og veggfóðrun.
 4. **Iðnteikning:**
 - a. Öllum nemendum, sem iðnteikningu læra, skal kennd teikniskrift, og skal hún notuð við alla teiknikennslu.
 - b. Kökugerðarmenn skulu teikna kökur og kransa, tertur og skraut á þær.
 - c. Bata- og skipasmíðir skulu gera línuteikningu af bát eða skipi, er sýni lag skipsins og stærð, útfærsluteikningu, er sýni, hvernig línuteikningin er færð út á flöt og hvernig smíðað er eftir henni, miðbandsteikningu og vinnuteikningu, er sýni langskurð skips, þilfarsflöt og lestarop, og seglateikningu, er sýni lengd og gildleika siglu og reiða.
 - d. Beykjar skulu gera útlits- og vinnuteikningar af helztu hlutum, sem þeim ber að geta smíðað.
 - e. Bókbindarar skulu gera teikningar af skreytingum á spjöld bókar og kjöl.

- f. Bifreiðasmiðir, bifvélavirkjar, blikksmiðir, eirsmiðir, flugvélavirkjar, ketil- og plötusmiðir, málmsteypumenn, vélvirkjar, járn- og rennismiðir, pípu- og gaslagningarmenn og skriftvélavirkjar, skulu gera frihendis frumdrátt að minni háttar hlutum, sem til iðnar þeirrar teljast. Eftir þeim frumdráttum skulu þeir gera útlits- og vinnuteikningar með öllum nauðsynlegum málum.
- g. Gull- og silfursmiðir, leirkerasmiðir, leturgrafarar, ljósprentarar, myndagerðarmenn, glerslíparar og speglagerðarmenn, myndskerar, prentarar og veggfóðrarar teikni frihendis stafi og skreytingar og hluti hver úr sinni iðn.
- h. Hárgreiðslukonur geri teikningar af hárgreiðslu, er hæfi mismunandi andlitsfalli og höfuðlagi.
- i. Húsasmiðir skulu gera vinnuteikningar af hurðum, gluggum, stigum, þökum, bítalögum, handriðum og skápum í eldhús og víðar, með öllum nauðsynlegum málum. Enn fremur skulu þeir teikna einföld hús, bæði grunnmyndir, þverskurði og útlitsteikningar.
- j. Húsgagnabólstrarar geri frihendis teikningar af fjaðrahúsgögnum og dýnum, svo og vinnuteikningar af greindum og fjaðrasetningu.
- k. Húsgagnasmiðir geri útlits- og vinnuteikningar af nokkrum algengum húsgögnum.
- l. Klæðskerar og feldskerar, kjólasaumarar, kvennaklæðskerar, netjarar, seglasaumarar og skósmiðir geri myndir af hlutum þeim, er varða iðn þeirra, og sýni mál og snið á efnispörtum í hlutina.
- m. Hattasaumarar teikni skreytingu á hatta og húfur.
- n. Málaraar teikni frihendis stafi, skreytingar og hluti. Einkum skulu þeir æfðir í skuggateikningum.
- o. Múrarar skulu gera útlits- og vinnuteikningar af hlöðnum múrbogum, múrbindingum, dregnum listum, tröppum, handriðum o. fl., er að iðn þeirra lýtur. Þeir skulu og kunna skil á járn-teikningum í járn-benta steinsteypu og geta gert grein fyrir, hvernig járn verði lögð í steypu eftir uppdraetti, er prófnefnd leggur fram, enn fremur kunna skil á einföldum húsateikningum.
- p. Steinsmiðir skulu teikna stólpa, legsteina og minnismerki svo og skreytingar á þau.
- q. Rafvirkjar skulu fá skurðar- og grunnmyndir af 3—4 húsnum til mismunandi nota, teikna raflagnir í þau og gera verklýsingu. Skulu teikningar valdar þannig, að þær sýni algengar raflagnir í íbúðarhús, verkstæði og iðjuver. Enn fremur skulu rafvirkjar gera tengimyndir af ýmsum tækjum og búnaði, er við kemur iðn þeirra.
- r. Rafvélavirkjar teikni vélar og tækjahluti, er varða iðn þeirra, svo og vinnuteikningar að einfaldri rafstöð eða háspennustöð.
- s. Reiðlygja- og aktygjasmíðir, tágaraar (körfugerðarmenn), mótasmiðir og vagnasmiðir geri útlits- og vinnuteikningar af þeim hlutum, sem þeim ber að kunna að smíða.
- t. Úrsmiðir teikni ganga og hjól í úr.
- u. Útvarpsvirkjar teikni mismunandi viðtækjahluti ásamt tengingum þeirra.

VII. Sérgreinar. Hárgreiðlukonur og hárskerar kunni lífeðlisfræði hársins og hirðingu þess. — Rafvirkjar og rafvélavirkjar kunni undirstöðuatriði í rafmagnsfræði. — Matsveinar, bakarar, kökugerðarmenn, kjötiðnaðarmenn og mjólkuriðnaðarmenn kunni undirstöðuatriðin í almennri efnafræði og helztu efna-

112
29. sept.

samböndum fæðutegunda. — Leirkerasmiðir, málara og prentara skulu kunna undirstöðuatriði almennrar litafraði og samsetningu lita.

7. gr.

Kennslustundafjöldi námsgreina yfir allan námstímann skal vera sem næst því sem hér segir:

	3 ára nám	4 ára nám	5 ára nám
Íslenzka	160	190	200
Erlent mál	160	190	250
Reikningur	160	190	250
Eðlisfræði	12	12	12
Efnafræði	12	12	12
Skrift	48	48	48
Bókhald	72	72	72
Flatarteikning	72	72	72
Rúmteikning	72	72	72
Frihendisteikning	144	144	144
Iðnteikning	0—120	264	400
Sérgreinar	0—24	0—26	100
	984	1302	1632
Meðaltal á ári um	338	325	326 kennslustundir

8. gr.

Heimilt er að hafa námsefni í hverri námsgrein mismunandi eftir iðngreinum eftir nánara samkomulagi við iðnfræðsluráð og Landssamband iðnaðarmanna.

9. gr.

Utan kennslustunda má flytja erindi um ýmis efni, nemendum til fróðleiks og hollrar skemmtunar.

Til þess má fá fyrirlesara í skólunum og utan þeirra, og er heimilt að greiða kostnað við það af óvissum útgjöldum skólanna.

10. gr.

Á námsskeiðum til undirbúnings iðnnámi skal, auk verklegrar kennslu, kenna íslenzku og reikning til inntökuprófs þeim nemendum, er þess þurfa. Einnig má kenna þeim byrjunaratriði undirbúningsteikninga. Námsskeiðin standi 3—9 mánuði eftir ástæðum.

11. gr.

Námsskeið til undirbúnings iðnnámi heita forskólar, og er tilgangur þeirra sá, að gefa unglingum, sem orðnir eru 14 ára að aldri, tækifæri til þess að kynnast verk-efnum, efni og vinnuháttum í tilteknum iðn- og iðju-greinum, svo að nokkur reynsla fái um það, hversu hæfir þeir eru til þess að stunda þær iðngreinar sem æfistarf.

Vinnutími forskólanna skal vera 36 stundir á viku að meðtöldum bókglegum kennslustundum.

Nú fær nemandi námssamning í sömu iðn og hann hefur stundað í forskóla, og má þá draga tíma hans í forskólanum frá námstíma námssamningsins. Sama gildir um vinnutíma í verknámsskólum, eftir nánari reglum, sem ráðherra setur að fengnum tillögum iðnfræðsluráðs.

12. gr.

112

Námsskeið fyrir starfsfólk í verksmiðjum og ýmiss konar iðnaðarstarfsemi skulu vera bókleg og haldin í samráði við stjórn hlutaðeigandi starfsgreinar, enda útvegi þær kennara í þeim greinum, sem kennarar skólans geta ekki kennt. 29. sept.

13. gr.

Framhaldskennsla fer eftir IV. kafla laga um iðnskóla.

III. KAFLI

Um stofnun iðnskóla og fjármál.

14. gr.

Forgöngu um stofnun iðnskóla geta haft:

1. Bæjarstjórnir.
 2. Sýslunefndir eða hreppsnefndir, enda semji hlutaðeigandi sveitarfélög, ef fleiri eru en eitt, um greiðslu þess hluta stofnkostnaðar og rekstrarkostnaðar, sem ríkissjóður greiðir ekki.
 3. Iðnaðarmannafélög eða sambönd þeirra, enda komi til meðmæli og samþykki þeirra aðila, sem getur í 1. og 2. tölulið.
- Ráðherra ákveður síðan um stofnun skólans, að fengnum tillögum iðnfræðsluráðs og hlutaðeigandi iðnfulltrúa.
- Ráðherra löggildir iðnskóla þá, sem nú eru starfandi og fullnægja ákvæðum 7., 8. og 9. greina, að fengnum tillögum iðnfræðsluráðs og hlutaðeigandi iðnfulltrúa.

15. gr.

Til iðnskólahalds samkv. lögum nr. 45/1955, má stofna með þrennu móti:

1. Stofna má sjálfstæða iðnskóla.
2. Þegar nemendur eru færri en 60, er ráðherra heimilt að ákveða, að iðnskólinn skuli vera sérstök deild innan gagnfræðaskóla, og skal iðnskólinn þá kostaður af sömu aðilum og í sömu hlutföllum og gagnfræðaskólinn.
3. Iðnfræðslu þá, sem nú er á ýmsum stöðum og ekki getur komizt undir ákvæði 1. og 2. töluliðs, má hafa með sama sniði og verið hefur.

Hlutdeild ríkissjóðs í rekstrarkostnaði iðnfræðslu, samkvæmt 3. tölulið, skal vera styrkur á sama hátt og verið hefur.

16. gr.

Ríkissjóður greiðir helming stofnkostnaðar þeirra iðnskóla, sem um getur í 1. tölulið 7. gr. Hinn hlutann greiða þeir bæjar-, sýslu- og sveitarsjóðir, sem að stofnun skólans standa.

Til stofnkostnaðar telst skólahús ásamt húsbúnaði og kennsluáhöldum, svo og vinnustofur, ef reknar eru, ásamt vélum og áhöldum.

17. gr.

Tala fastra kennara fer eftir starfsmannafjölda skólanna, kennslustundafjölda á viku og nemendafjölda, og skal í þeim efnum miða við hliðstæð atriði í skólum gagnfræðastigsins.

Ríkissjóður greiðir laun skólastjóra og fastra kennara, svo og styrk til stundakennslu hlutfallslega fyrir þá nemendur, sem umfram eru þá tölu, sem ætluð er föstum kennurum. Sé eigi aðstaða til þess að ráða fasta kennara, skal greiða stundakennslu úr ríkissjóði eftir því, sem starfstími skólans og nemendafjöldi leyfir.

112 Ráðherra ákveður skólagjöld að fengnum tillögum skólanefndar. Gjöld þessi, svo
29. sept. og hreinar tekjur af skólavinnustofum, koma til frádráttar rekstrarkostnaði áður en honum er skipt.

18. gr.

Skólanefndir annast fjárreiður og reikningshald iðnskóla í umboði viðkomandi sveitarfélags. Um reikningshald, endurskoðun og eftirlit gilda sömu reglur og um aðra skóla, sem reknir eru sameiginlega af ríki og sveitarfélögum.

IV. KAFLI

Um próf.

19. gr.

Árspróf skal halda að loknu námi í öllum neðri bekkjum og burtfararpróf að loknu námi í efsta bekk hverrar iðngreinar.

Lokapróf í þeim námsgreinum, sem ekki eru kenndar í efsta bekk hverrar iðngreinar, teljast til burtfararprófs, þar með próf í undirbúningsteikningum og teikniskrift.

Fullnaðareinkunnir:

5.00— 5.99	teljast þriðja einkunn
6.00— 7.24	— önnur —
7.25— 8.99	— fyrsta —
9.00—10.00	— ágætis —

20. gr.

Öll próf skulu vera skrifleg, nema í erlendum málum skulu þau að jafnaði vera munnleg.

21. gr.

Einkunnir skal gefa í tölum frá 0—10 og tugabrotum úr þeim, með einum aukastaf og tveimur í fullnaðareinkunn. Til þess að standast próf í almennum námsgreinum þarf einkunnina 3 hið lægsta, en í öllum teikningum og sérgreinum og aðal-einkunn 5 hið lægsta.

Kennarar skólanna skulu gefa nemendum einkunnir í lok kennslunnar ár hvert, hver í sinni grein. Nefnast þær árseinkunnir og eru úrslitadómur kennara um kunnáttu nemanda, framfarir og afköst.

22. gr.

Fullnaðareinkunn í hverri námsgrein er árseinkunn $+ 2 \times$ prófeinkunn deilt með 3.

Kennarafundur getur samþykkt að flytja nemendur með háa árseinkunn í einni námsgrein eða fleirum próflaust upp úr bekk í þeirri eða þeim námsgreinum. Þetta gildir þó ekki um teikningar og blökkskrift (teikniskrift) og ekki um burtfararpróf.

23. gr.

Nú vill nemandi þreyta próf í tveimur eða fleiri bekkjum samtímis, og skal hann þá, áður en til prófs kemur, færa sönnur á, að hann hafi lært allt það, er hann óskar að þreyta próf í, og gera grein fyrir hverrar kennslu hann hafi notið. Á teikningum og öðrum verklegum æfingum skal ekki krafizt síðri frágangs en af öðrum skólánemendum.

Prófunum skal svo fyrir komið, að nemandinn þreyti próf fyrst í hinum lægsta bekk og síðast í hinum efsta. Ná hann ekki einkunninni 7 í hverri námsgrein í hinum lægri bekkjarprófum, skal honum óheimilt að þreyta próf í efri bekk.

24. gr.

Nú nær nemandi ekki prófi í helming námsgreina á ársprófi eða burtfararprófi, og skal hann þá taka allt prófið aftur. Nái hann prófi í helming námsgreina eða meira, en ekki í öllum, má hann taka það, sem á vantar, eða einstakar greinar þess, þegar þau próf eru haldin við skólann síðar.

112

29. sept.

25. gr.

Ekki má flytja nemanda úr lægri bekk í efri fyrr en hann hefur lokið upptöku-prófi í efri bekkinn, nema kennarafundur samþykki, og teljast þá árseinkunnir í þeim námsgreinum, sem próf er fellt niður í, með í prófinu.

Nú mætir nemandi til burtfararprófs og hefur próf frá öðrum skóla, er sýni eins mikla eða meiri kunnáttu í einni eða fleiri prófgreinum en heimtaðar eru til prófsins og er þá heimilt að sleppa honum við próf í þeim greinum og telja einkunnir hans í hinu fyrra og meira prófi til burtfararprófsins, en leggja skal hann fram skilríki fyrir kunnáttu sinni.

26. gr.

Nú vill nemandi þreyta próf í skólanum án þess að hafa stundað þar nám (utan skóla) og gilda þá um hann ákvæði 23., 24. og 25. greinar hér að framan.

Utanskólanemendur og þeir sem hlaupa yfir bekk skulu greiða prófgjöld, sem skólastjóri og skólanefnd ákveða. Renna þau í sérsjóði skólanna (styrktarsjóði), eftir ákvörðun skólastjóra og skólanefndar.

27. gr.

Við skrifleg próf má nota þau gögn ein, sem skólastjóri leyfir.

Nemendur, sem staðnir eru að því að nota óleyfileg gögn eða hafa rangt við á prófum, hafa fyrirgert rétti til þess að ljúka prófi í það sinn. Skal minna nemendur á þetta ákvæði áður en skrifleg próf hefjast.

28. gr.

Í hverjum iðnskóla skal vera prófbók eða spjaldskrá og skal rita í hana allar einkunnir við árspróf og burtfararpróf, meðaltölu þeirra og fullnaðareinkunn, og einkunn fyrir ástundun og hegðun.

29. gr.

Við burtfararpróf dæma hlutaðeigandi kennarar og prófdómarar um úrlausnir. Skal vera einn prófdómari í hverri grein, skipaður af menntamálaráðuneytinu að fengnum tillögum skólanefndar og skólastjóra. Prófdómarar velja verkefni prófanna í samráði við kennara og afhenda þau skólastjóra í tæka tíð.

Að loknu skriflegu prófi tekur kennari við úrlausnum, leiðréttir þær og dæmir, en síðar prófdómari, og koma þeir sér saman um einkunn. Ef ágreiningur verður um einkunn, hvort heldur er fyrir munnlega eða skriflega úrlausn, skal taka meðtalt af einkunnagjöf kennara og prófdómara.

30. gr.

Að loknu burtfararprófi skal afhenda nemendum þeim, sem staðizt hafa prófið, burtfararskirteini með árituðum einkunnum fyrir hverja námsgrein ásamt fullnaðareinkunn. Prófskirteini skal einnig láta nemendum í té með árituðum einkunnum fyrir hverja námsgrein í ársprófum. Getur það verið sérstakt skirteini eða áritun í viðverubók.

112

29. sept.

31. gr.

Í byrjun hvers ársnáms skal afhenda hverjum nemanda viðverubók og skal vikulega skrá í hana, hve oft nemandann hefur vantað í skólann seinastliðna viku og af hvaða ástæðum, svo og hve oft hann hefur mætt of seint. Skal nemandinn síðan sýna heimilisföður sínum (eða móður) og meistara bókina og fá áritun þeirra.

Bók þessa má svo nota sem prófskírteini milli bekkja og við ákvörðun um einkunn fyrir ástundun og hegðun.

V. KAFLI

Um stjórn skólanna og starfsmenn.

32. gr.

Skytt er að taka við öllum iðnnemum úr umdæmi skólans, ef þeir hafa löglega námssamninga og fullnægja að öðru leyti settum skilyrðum. Iðnmeistarar og iðnfyrirtæki skulu tilkynna hlutaðeigandi skóla, þegar samningar eru gerðir við nýja iðnnema, og senda þá til byrjunarnáms, er það hefst næst. Einnig skal tilkynna ef nemandi hættir iðnnámi eða getur ekki haldið áfram skólanámi af öðrum ástæðum.

Iðnfræðsluráð skal árlega senda skólunum skrá yfir þá námssamninga, sem staðfestir hafa verið á skólasvæðinu.

Í byrjun hvers skólaárs skulu skólarnir senda iðnfræðsluráði tilkynningu um þá nemendur, sem á skrá eru, en hafa ekki mætt til náms í skólanum.

Í lok hvers skólaárs skulu skólarnir á sama hátt senda Iðnfræðsluráði yfirlit um þá nemendur, sem vanrækt hafa nám sitt á skólaárinu. Enn fremur skal tilkynna því, ef nemandi er vikið úr skóla að fullu.

Iðnskólum, sem fleiri en 60 nemendur stunda nám í, stjórnar 5 mannskólanefnd. Þar sem kaupstaður stendur einn að slíkum skóla, sýsla eða hreppur, kys bæjarstjórn, sýslunefnd eða hreppsnefnd 4 nefndarmenn á fyrsta fundi eftir kosningar. Ef fleiri en einn kaupstaður, sýsla eða hreppur stendur að skólanum, skal svo fljótt, sem því verður við komið, kjósa skólanefndina á sameiginlegum fundi hlutaðeigandi sveitarstjórna. Að minnsta kosti helmingur þeirra, er kjósa skal í skólanefnd, skulu vera iðnaðarmenn.

Iðnskólum, sem færri en 60 nemendur stunda nám í, stjórnar 3 manna skólanefnd; skulu 2 þeirra kosnir á sama hátt og að framan greinir.

Ráðherra skipar formenn skólanefndanna til sama tíma.

33. gr.

Ráðherra setur eða skipar skólastjóra, að fengnum tillögum skólanefndar og fræðslumálastjóra, og fasta kennara, að fengnum tillögum skólanefndar og skólastjóra. Skólastjóri ræður stundakennara með samþykki skólanefndar. Um launakjör og kennsluskyldu, svo og menntun kennara í almennum greinum, gilda sömu ákvæði sem um skólastjóra og kennara við gagnfræðaskóla, eftir því sem við getur átt.

34. gr.

Skólastjóri hefur á hendi daglega stjórn hvers skóla, umsjón með kennslu, aga, umgengni og framkomu og sér um eignir skólans. Fastir kennarar skulu vera honum til aðstoðar í starfi hans eftir því sem ástæður leyfa og hann kveður þá til. Þar sem 300 nemendur eða fleiri stunda nám í skóla, getur ráðherra skipað yfirkennara skólastjóra til aðstoðar.

Í skólum, sem hafa fjölþætta starfsemi, t. d. forskóla, framhaldsskóla og námskeið, auk iðnfræðslu iðnnema, getur ráðherra skipað einn yfirkennara fyrir hvern þátt skólastarfsins.

Með samþykki ráðherra má annað hvort ákveða yfirkennurum aukabóknun eða færri kennslustundir. 112
29. sept.

35. gr.

Í lok hvers skólaárs ber skólastjóra að senda fullnægjandi skýrslu um skólahaldið til skrifstofu fræðslumálastjóra.

36. gr.

Nú verður hlé á kennslu frá prófi og þar til næsta námsskeið byrjar eða af öðrum ástæðum, og eiga þá hvorki stundakennarar né fastakennarar kröfu á kaupi fyrir stundakennslu fyrir þann tíma.

37. gr.

Hver kennslustund skal að jafnaði vera 50 mínútur.

38. gr.

Fela má fastakennurum aukastörf í þágu skólans, eftir nánara samkomulagi við skólastjóra, svo sem umsjón með söfnum skólans, eftirlit með nemendum í frímínútum og á samkomum nemenda og aðstoð við félagsstarfsemi í skólanum. Heimilt er skólastjóra að fækka skyldustundum kennara ef slík aukastörf verða mikil og koma misjafnt niður.

39. gr.

Yfirstjórn skólanna ákveður kennsluskyldu skólastjóra.

40. gr.

Nú hefur kennari gegnt embætti í 10 ár og óskar að hverfa frá störfum í eitt ár til að efla þekkingu sína og kennarahæfni, og skal hann þá senda ráðherra beiðni um orlof ásamt greinargerð um, hvernig hann hyggst að verja orlofsárinu. Ef ráðherra telur þá greinargerð fullnægjandi, getur hann veitt kennaranum ársorlof með fullum launum. Engum kennara skal þó veitt slíkt orlof nema einu sinni. Beiðni um orlof skal send ráðuneytinu með árs fyrirvara og veitir það kennurum, er þess óska, leiðbeiningar um, hvernig orlofsárum skuli varið, en allir verða þeir að gefa því fullnægjandi skýrslu um störf sín að orlofsári loknu, að viðlögðum launamissi fyrir það ár. Ráðherra setur nánari reglur um framkvæmd orlofs kennara. Skal þess gætt, að það trufli ekki störf skólanna eða torveldi þau.

VI. KAFLI

Um aga og reglu.

41. gr.

Agi skólanna skal miða að því að halda uppi reglu og efla með nemendum iðjusemi, hófsemi og þrúðmennsku. Skulu kennarar og nemendur leitast við í sameiningu að glæða heilbrigðan anda í skólanum.

42. gr.

Nemendur skulu í skólanum gæta fyllstu reglusemi í hvivetna. Áfengi má eigi hafa um hönd í húsakynnum skólanna. Brjótí nemendur gegn þessu, skal skólastjóri vanda um við þá og áminna og gera forráðamönnum þeirra aðvart um brotið. Skipist nemendur eigi við endurtekna áminningu, ber að vikja hinum brotlegu úr skóla.

Komi kennari til starfa undir áhrifum áfengis, neyti þess í hibiylum skólans eða vanræki störf sakir vinneyzlu, ber skólastjóra að gera ráðuneytinu aðvart og mun slík hegðun kennara látin varða stöðumissi.

112

43. gr.

29. sept.

Nú gerist nemandi á annan hátt brotlegur við reglugerð skólanna eða starfsreglur. Skulu kennarar þá vanda um við hann eða tilkynna skólastjóra, ef brotið er stórt. Skipist nemandi ekki við slíkar umvandanir kennara eða skólastjóra, getur skólastjóri vikið honum úr skóla um stundarsakir eða til fulls og skal þá kennarafundur og skólanefnd hafa fjallað um málið. Tilkynna skal meistara nemanda áður um brotið.

VII. KAFLI

Um listiðnaðardeildir.

44. gr.

Verði notuð heimild síðustu málsgr. 7. gr. laga nr. 45/1955 varðandi listiðnaðardeildir Handíða- og myndlistarskólans í Reykjavík, skulu þær hlíta sömu reglum um þátttöku ríkissjóðs í greiðslu kostnaðar og iðnskóladeildir í gagnfræðaskólum.

Reglugerð þessi, sem sett er samkvæmt lögum nr. 45/1955, um iðnskóla, öðlast þegar gildi.

Í menntamálaráðuneytinu, 29. september 1955.

Ingólfur Jónsson.

Birgir Thorlacius.

113

REIKNINGUR

Styrktar- og sjúkrasjóðs vitavarða Íslands 1954.

Tekjur:

Í sjóði frá fyrra ári		kr. 25419.23
Tillög vitavarða	kr. 9052.79	
Gestafé	— 3730.36	
Vextir	— 7296.21	
Ríkissjóðsstyrkur	— 3000.00	
		— 23079.36
Útdr. vaxtabréf Stofnlánadeildar sjávarútvegsins	kr. 2000.00	
— skuldabréf vatnsv. Hafnarfjarðar	— 15000.00	
— Sogsvirkjunarlán	— 1000.00	
— skuldabr. Byggingarsamvinnufél. starfsm. ríkisins	— 1000.00	
		— 19000.00

Kr. 67498.59

Gjöld:

Sjúkrastyrkur	kr. 2000.00
Inneign í sparisjóði Landsbanka Íslands	— 65498.59

Kr. 67498.59

Eignir:

10. fl. bankavaxtabréf Landsbanka Íslands	kr. 5000.00
4% Sogsvirkjunarlán 1943	— 2000.00
4% verðbréf Stofnlánadeildar sjávarútvegsins	— 17000.00